

Niú-suh

2001 nî 12 góeh chhe 1, lán KLH khì Pîn-tong ê Lāi-po kap Bân-kim khòaⁿ kó-cheok. Tiuⁿ Hòk-chû hōe-tiúⁿ chhōa-thâu, hōe-gôan kap hōe-iú kā 1 tâi bá-suh chē kàu tīⁿ-tīⁿ. Chit chōa m̄-nā khòaⁿ tiòh Lāi-po kheh-chng ê tōa-hiā-chhù, koh ū pài-hóng Bân-kim ê Thian-chú-kàu tñg. Siōng kài hó-khang..ê sī ē-sái sék-sái Bân-kim Makatau gôan-chū-bîn Phoaⁿ--Sian--siⁿ. I siōng-sè kā lán kái-soeh Thian-chú-tñg ê lèk-sú, kiàn-tiòk kap hong-siòk, koh ēng gôan-chū-bîn ê koan-tiám, khui-phoah chē-chē lâng ê “Tâi-ôan-lâng sī Hán-jîn” ê bî-su(myth). I kià-bāng tâi-ke m̄-thang khin-piat gôan-chū-bîn, kín-kín kiat-háp chèng-lâng ê khùi-lát, kiàn-lip pún-thór ê chû-thé-sèng, kè-siòk ūi kiáⁿ-sun phah-piàⁿ.

Hó-khang ê Hák-síp Ki-hōe

Lán KLH ê kàu-hák jú lâi jú chhia-iáⁿ. Tû liáu kū-té ê chho-kip-pan kap tiong-kip-pan í-gōa, koh beh khui Kè-siòk Kàu-iòk-pan. Lán chai-iáⁿ chiong-kî it-seng ê hák-síp sī kàu-iòk ê chòe tiōng-tiám. Hiān-chhú-sî ê kàu-iòk sī ūi tiòh bī-lâi ê kàu-iòk chò chún-pī, só-í lán koat-tēng beh koh khui Kè-siòk Kàu-iòk-pan lâi ôan-sêng chit-ê bòk-phiau. Pò-mâa ê chu-keh sī KLH tiong-kip-pan pit-giáp. Khò-thêng ū Tâi-gí Gí-giân-hák, Tâi-ôan Lèk-sú, Gí-im Hòk-síp, Tâi-gí Tiān-náu kap Bāng-lō ê sú-iōng, phng-phài koh chhe-chhau. Ùi 2001/12/25 khai-sí múi lé-pài 2, 7:00 kàu 9:30 pm tiàm Ko-I W21 kàu-sek siōng-khò. Khò-thêng lóng-chóng sī 25 tiám-cheng. Lòh-bóe ū chhek-giām, thong-kòe..ê pan-hoat kiat-giáp chèng-su. Siūⁿ beh chham-ka ê lâng chhiáⁿ kā Tiuⁿ Hòk-chû I-su pò-mâa.